

**Partiit nunanit allanit tapiissutinik tapiissuteqartunik
pissarsiaqarsinnaatitaanginnermut aamma partiit nunatta avataani najugaqartut
angerlarsimaffeqartulluunniit Qallunaat Nunaanneersut Savalimmiuneersullu
inerteqqummut ilanngunneqarnissaat pillugu Inatsisartut inatsisaat nr. 14, 4. februar
2025, §4b allangortinneqarnissaanut Naalakkersuisut inatsimmut allannguutissamik
suliaqaqqullugit Inatsisartut aalajangiiffigisassaattut siunnersuut.
Siunnersuut kingusinnerpaamik UKA2026-mi saqqummiunneqassaaq
*Pele Brobergimit, Naleraq, saqqummiunneqartoq***

pillugu

Inatsisinut Ataatsimiititaliap

siunnersuutip aappassaaneerneqarneranut

ISUMALIUTISSIISUTAA

Ataatsimiititaliap suliarinninnermini uku inuttarai:

Inatsisartunut ilaasortaq Aqqalu C. Jerimiassen, Atassut, siulittaasoq

Inatsisartunut ilaasortaq Kuno Fencker, Naleraq, siulittaasup tullia

Inatsisartunut ilaasortaq Pipaluk Olsen, Demokraatit

Inatsisartunut ilaasortaq Iddimangiiu Bianco, Inuit Ataqtigiit

Inatsisartunut ilaasortaq Lars Poulsen, Siumut

UKA2025-mi 23. oktober 2025-mi siullermeerinninnerup kingorna ataatsimiititaliap
siunnersuut misissorpaa.

Siunnersuutip imarisaa siunertaalu

Siunnersuut akuerineqassappat inatsisip atuuttup allanngortinneqarnissaanik siunnersuummik saqqummiusseqqullugit Naalakkersuisut peqquneqassapput, taamaalilluni partiit tapiissuteqartartunit nunanit allaneersunit pissarsiaqarsinnaatitaannginnerat Danmarkimit Savalimmiunillu tapiissuteqartartunut aamma atuutilissalluni.

Inatsit maanna atuuttoq malillugu partiit Kunngeqarfimmi Danmarkimi partiinit nalunaarsorneqartunit tapiissutinik pissarsisinnaatitaapput.

Siunnersuutip Inatsisartunit siullermeerneqarnera

Siunnersuut siullermeerneqarami tapersorsorluarneqarpoq.

Naalakkersuisut siunnersuut tapersorsorpaat siunnersuullu ilusimisut iluseqartoq akuerineqassasoq inassutigalugu.

Partii ataaseq minillugu siunnersuut partiinit tamanit tapersernejarpoq, ilaatigulli “aningaasatigut tapiissutit” qanoq paasineqarnissaa eqqarsaatigalugu siunnersuut annertunerusumik erseqqissarneqartariaqartoq ataasiakkaat isumaqarlutik. Taamatutaaq Inatsisartunit ilaasortat ataasiakkaat tapiissuteqartartunit nunanit allaneersunit pissarsisinnaanerisa inerteqqutaalernissaa aamma pingaaruteqartoq partiit ilaat ataaseq isumaqarpoq.

Ilaatigut tamakku tunngavigalugit siunnersuut ataatsimiititaliamit suliarineqartussanngorlugu innersuunneqarpoq.

Siunnersuutip aningaasaqarnikkut kingunerisassai

Aalajangiiffigisassatut siunnersuutit piviusunngortinneqarneranni aningaasaqarnikkut allaffisornikkullu kingunerisassat siunnersuutip tunngavilersuutitaani nassuiaatigineqartassasut Inatsisartut suleriaasianni § 33, imm. 1-imi allassimavoq.

Tamanna naapertorlugu siunnersuut piviusunngortinneqarpat aningaasaqarnikkut kingunerisassat nalunaarneqarsimasut ataatsimiititaliamit maluginiarneqarpoq, taamaalilluni taakku ukioq naallugu AC-fuldmægtigit atorfimmut affarmut, tassa imaappoq 250.000 kr.-inut naapertuunnissaat naatsorsuutigineqarluni.

Ataatsimiititaliap siunnersuummut oqaaseqaatai

Siunnersuut siullermeerneqarmat annertoorujussuarmik tapersernejarpoq ataatsimiititaliamit

aallarniutigalugu oqaatigineqassaaq.

Inatsimmi § 4 b-p maanna oqaasertaliorneqarnera ataatsimiititaliamit maluginiarneqarpoq, tassani ima aalajangersaasoqarluni:

”§ 4 b. Partiit, najukkani inuusuttunullu immikkoortortaqaarfii ilanngullugit, nunanit allanit kinaassutsimilluunniit isertuussilluni tapiissuteqartunit tapiissutinik § 1. imm. 1, nr. 3-4-mut ilaatinneqartunik pissarsiaqarsinnaatitaanngillat. Nunanit allanit tapiissuteqartutut paasineqassapput tapiissuteqartut Kalaallit Nunaata avataani najugaqarlutilluunniit angerlarsimaffillit. Nunanit allanit tapiissuteqartunit tapiissutinik pissarsiaqarsinnaatitaannginnermut partiinit kunneqarfimmi nalunaarsorneqarsimasunit tapiissutit ilaatinneqanngillat.

Imm. 2. Partiit, najukkani inuusuttunullu immikkoortortaqaarfii ilanngullugit, tapiissutinik imm. 1-imi taaneqartunik tunineqarpata, partiip tapiissutit piissarsiarineqarnerinit sapaatit akunnerisa sisamat qaangiutinnginnerini tapiissutit utertissavaat. Tapiissutit utertinneqarsinnaanngitsut nunatta karsianut nakkartinneqassapput, piissarsiarineqarnermillu kingorna sapaatit akunnerisa arfineq-pingasut qaangiutinnginnerini kontumut aningaasaqarnermut naalakkersuisoqarfimmit innersuussutigineqartumut nuunneqassallutik.

Imm. 3. Imm. 1 aamma 2 taamaaqataanik ukununga atuutissapput:

- 1) Folketingimut Inatsisartunulluunniit ilaasortanut taakkulu sinniisussaannut, aamma
- 2) inunntut Folketingimut Inatsisartunulluunniit qinersinissamut aggersumut qinigassanngortissimasunut”

Inatsisartunut Folketingimulluunniit ilaasortat tapiissuteqartartunit nunanit allaneersunit kinaassutsimilluunniit isertuussilluni tapiissuteqartartunit tapiissutinik pissarsisinnaanerit § 4 b, imm. 3-mi taamaalilluni inerteqqutaareersoq ataatsimiititaliamit maluginiarneqarpoq.

Tassunga atatillugu oqaaseq *tapiissutit* ersernerlussinnaasoq ataatsimiititaliamit oqaatigineqassaaq. Aalajangersagaq nassuiaatillu ima paasineqarsinnaapput aningaasaqarnikkut tapiissuteqartoqarnissaa inerteqqutaasoq, tassa tapiissutit taamaattut utertinneqarnissaat, taamaanngippallu nunatta karsianut nuunneqarnissaat ilaatigut pisussaaffiummat.

Inuiaqatigiinnili ullumikkut tapiissutigineqartartut aningaasaannaajuaannanngitsut ataatsimiititaliamit maluginiarneqarpoq, tamatumanimi aamma ilaasinnaammata atortut, akikilliliissutit sullississutillu il.il., partiimut ilaasortamulluunniit naleqartut.

Assersuutitut taaneqarsinnaavoq partii ilaasortarlunniit tusagassiorfinnik attaveqarnermik sungiusarnissamut tapiissuteqartartumit nunanit allaneersumit taperneqartoq, tassa aningaasartuutit tapiissuteqartartumit akilerneqarlutik. Sullississut taamaattoq akisoorujussuusinnaavoq, aalajangersakkalli oqaasertai malillugit tapiissuteqartartumit nunanit allameersumit sullississut taamaattoq inerteqqummut ilaatinneqassanngilaq, tunngaviatigullu partii ilaasortarlunniit aningaasaanngitsumik allatut iluaquserneqassalluni.

Assersuut alla tassaasinnaavoq partii oqallittarfinni nittarsaassinnermut aningaasartuutininik imaluunniit naqitertitanut assigiinngitsunut aningaasartuutininik akiliunneqartoq, taamaalillunilu aningaasartuutit partiimit namminermit akilerneqarnatik tapiissuteqartartumit akilerneqarlutik.

Tapiissutit taakku nunatsinni ingerlatseqatigiiffinnit inuinnarnilluunniit aamma tunniunneqarsinnaapput, taakku aningaasanik nuussinerinnartut isigineqarsinnaanngimmata, taamaalillutillu sullississutit taamaattut partiit ukiumoortumik naatsorsuutininik tunniussinerannut atatillugu tamanut saqqummiussinissaq pillugu inatsimmi piumasaqaatinut toqqaannartumik ilaasutut isigineqarsinnaanatik.

Tamanna tungavigalugu inatsisip oqaasertai erseqqissarneqartariaqarnersut ataatsimiititaliamit oqaluuserineqarpoq, taamaaliornikkut tapiissutit suunerisa nassuiarneqarnera erseqqissarneqarluni aammalu aningaasaannaanngitsunik tapiissutit allat inatsimmut ilanngunneqarlutik.

Tassunga atatillugu ataatsimiititaliaq allannguutissatut siunnersuummik ima oqaasertalimmik saqqummiussivoq:

”Naalackersuinikkut ingerlatsisut partiit naatsorsuutaasa tamanut saqqummiunneqartarneri pillugit Inatsisartut inatsisaata allanngortinneqarnissaanut inatsisissatut siunnersuummik saqqummiusseqqullugit Naalackersuisut peqquneqarnissaannik Inatsisartut aalajangiiffigisassaattut siunnersuut, taamaalilluni tapiissutit qanoq paasineqarnissaannik erseqqissaasumik oqaasertaliisoqarluni, tamatumani tapiissutit allat aningaasaannaanngitsut taamatuttaaq ilaatinneqalerlutik kiisalu tapiissuteqartartunit nunanit allaneersunit tapiissutinik pissarsisinnaanermik inerteqqut partiinit Danmarkimi Savalimmiunilu nalunaarsorneqartunit Kalaallit Nunaanni imaluunniit Kalaallit Nunaata avataani najugaqartunit angerlarsimaffeqartunilluunniit tapiissutit aamma ilaatinneqalerlutik. Siunnersuut kingusinnerpaamik UKA2027-mi saqqummiunneqassaaq.”

Tamatumani inatsisip allanngortinneqarnissaannik siunnersuut sukumiisumik aaqqissuunneqartariaqarlunilu suliarineqartariaqassaaq, tamannalu pissutigalugu piffissaq sivilunerusoq pisariaqartinneqassagunarluni kiisalu AC-fuldmægtigit ukioq naallugu atorfimmud, tassa imaappoq 500.000 kr.-inut naapertuuttumik aningaasaqarnikkut kinguneqarnissaa naatsorsuutigineqarluni.

Ataatsimiititaliap inassuteqaatai

- Ataatsimiititaliap isumaqatigiittup allannguutissatut siunnersuut imaattoq akuerisassanngorlugu saqqummiuppaa:

”Naalakkersuinikkut ingerlatsisut partiit naatsorsuutaasa tamanut saqqummiunneqartarneri pillugit Inatsisartut inatsisaata allangortinneqarnissaanut inatsisissatut siunnersuummik saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaalilluni tapiissutit qanoq paasineqarnissaannik erseqqissaasumik oqaasertaliisoqarluni, tamatumani tapiissutit allat aningaasaannaangitsut taamatuttaaq ilaatinneqalerlutik kiisalu tapiissuteqartartunit nunanit allaneersunit tapiissutinik pissarsisinnaanermik inerteqqut partiinit Danmarkimi Savalimmiunilu nalunaarsorneqartunit Kalaallit Nunaanni imaluunniit Kalaallit Nunaata avataani najugaqartunit angerlarsimaffeqartunilluunniit tapiissutit aamma ilaatinneqalerlutik. Siunnersuut kingusinnerpaamik UKA2027-mi saqqummiunneqassaaq.”

Ataatsimiititaliap taama oqaaseqaateqarluni isumaliutissiisummilu allassimasutut paasinnil-
luni siunnersuut aappassaaniigassanngortippaa.

Aqqalu C. Jerimiassen
Siulittaasoq

Kuno Fencker
Siulittaasup tullia

Pipaluk Olsen

Iddimangiiu Bianco

Lars Poulsen